

# Nzryr-krbz Pol Krali Mz Lr Korint Natq Ngr Nzaplxtqngr Mz Nzryr-krbz Pol Krali Mz Lr Korint

Mzli kc tqmncngr Aposol Pol mz taon Efisz, yrbzle 'Nzryr-krbz Pol Kx Ayrnrngr Mz Lr Korint.' Mz letz lc, rpile kx Timoti sa naoklatile nidr x mz nibrde nayzlu-mop bade. ✧ Opx angidr kx Timoti pibzle mz Pol kx kzdung aposol kxnzalvztr-rbrng kcng tzprtrng mz lr Korint nzbatrpzlr badr nzrlxngiti-krdr kx Pol trngiu aposol angidr. Zbz Pol oklatile nidr mzli kxpipz kx trmrlz-etr-ngru drtwrdr, x nzycmne-krbzle badr pqtx zlwz. ✧ Zbz sc tqyzlupe mou Efisz x pnzpe drtwrde nzatwzlr-krbzle Taetus badr, mz nzokatr-krde nztekqtr-krdr nqm q nr drtwrdr. X kzdung mzli mz nibrde, rlaszle taon kc Efisz, x rmctile Taetus mz Masedonia Provins, mz nyzlu-krbzle bade, mwz mz taon kc Filipae. ✧ Mzli lcde, yiz esz' mz nibr 'Nzryr-krbz Pol Kx Ayrnrngr Mz Lr Korint,' yrbzle letz lc, mwz mz mzlr yiz 55—56 AD mz nibr nzrmcngnr mz Jisz. X Taetus twzbzle letz lc mz lr Korint. ✧ Zbz sc tqoklatipe Pol nidr mz nzwrde kratq. X mz nzmnc-krde kc mz Korint, yrbzle 'Nzryr-krbz Pol Mz Lr Rom.'

Mz letz lc, awi-ngrbz Pol mz Gct lr Korint

---

✧ : 1 Korint 16:10-11    ✧ : 2 Korint 2:1; 12:14; 13:1-2    ✧ : 2 Korint 2:12-13; 7:5-16    ✧ : 2 Korint 8:16-24

kcng tztektqtrlr nqmq nr drtwrdr, x rlxrtibzle  
mz krkcng tzxpqbrlr-ngrdr nide kx natekqtr-  
kzlr nqmq nr drtwrdr. Pibzle badr da kqlu mz  
nzaelwapx-krde kx nide aposol angidr.

### **Mrkcng Mz Letz Lc**

Gct amqtr-zvzle drtwr kxnzrlxngiting. [1:3-11]  
Pol ayzlubzle natq leplz kcng tzrpilr kx da kcng  
tqpilr pokia-ngrde. [1:12—2:4]

Lr Korint naipqlr kztedrng kcng tztektqtrlr  
nqmq nr drtwrdr mz alwx ngrdrng. [2:5-13]

Kxnzrlxngiting nzaovxio-zvzlr Setzn mz  
nzaxvctr-krbzlr mz Kxnzmcp. [2:14-17]

Pol nide angidr aposol murde nqmq kr lr  
Korint mrlz. [3:1-6]

Nzesz'tikr Drtwr Gct Kxmrna badr leplz ne-  
deng myaszpx-zlwzle krkc kai mz Lou Sc  
Mosis. [3:7-18]

Kxmu nqmq kr Pol mz nzwz-krde. [4:1—6:13]

Nimu kxnzrlxngiting bzkq axvctr-lzbqzbmu  
mz kxtrnzrlxngitiung. [6:14—7:4]

Taetus rlwa-ngrbzle mz Pol nrpa ngr lr Korint  
kxnzrlxngiting. [7:5-16]

Nzatakqtilr trau mz nzwzkr lrmakxtr. [8—9]

Pol ayzlubzle natq leplz kcng tzpibqtilr nide.  
[10—12]

Pol lc-apq-mopwzle mz leplz kcng tzrpwa'-  
ngrbzlr nzwz-krde. [13:1-10]

Pol pibzle natq ngr nzarlr-lzbqng. [13:11-14]

<sup>1</sup> Ninge Pol kc tqkqle Jiszs Kxnzmcp. mz  
nzngini-krnge aposol nede mz nzvz-nqblq-krde  
me pnz drtwr Gct. Nigr ncd. mzlegu Timoti  
rpibzkr bamu kx, “Nimu la!” Ryrbo bamu, nimu

lr makxtr ne Gct kx nzmncng mz taon kxetu Korint, x kxnzrlxngiting kc-kzng mz provins kc Akaia. \*

<sup>2</sup> Krka'-ngrne kx Trtegu Gct x Kxetu rgu Jiszs Kxnmcpx nakabzlr bamu zmrlz ngrdr kxmyalz x nzmnc-zpwxngr.

### *Gct Amqtr-zvzmlle Drtwrgu*

<sup>3</sup> Naglqlzku Gct x na-awi-ngrbzku bade, mz nznngini-krde Trte Jiszs Kxnmcpx, Kxetu rgu. Murde yc zvz mz drtwrde nigu x amqtr-zvzmlle drtwrgu.

<sup>4</sup> Mz nzapqtr-zvz-krmlle lc drtwrgu mz nzkxpu-krqu, krlz-kzku nzapqtr-ngrbz drtwr kztegunq mz nzkxpu-krdrng, mz nzvz-nqblq-krde nqm q kr Gct mz nzapqtr-krmlle drtwrgu.

<sup>5</sup> Lepz nzaetq-zvzbzlr drtqgu mz nzaxvctr-krbzku mz Jiszs Kxnmcpx, da kc tqwai nzaetq-zvz-krbzlr drtqde. A' mzli lcpwz, apqtr-zvzm Gct drtwrgu, da kc tqwai nzapqtr-zvz-krbzle drtwr Jiszs.

<sup>6</sup> Mz nzmu-krde lcde, kxmule-esz' drtqgr nza-etq, nigr aposol, o drtwrgr nzapqtrpqng, a' da lcng li ngi dalr nzokatrngr nimu. Murde nzetqkr drtqgr okatrle nigr mz nzapqtr-krbzkr drtwrmu mz nzetqkr drtqmu. X mz nzapqtr-krm Gct drtwrgr mzli lc tqtrka, okatrle nimu mz nztu-amqngi-zvz-krmu mz nzbrtikr drtwrmu nide, kxmule-esz' drtqmu etq, da kc tqwaikr mz nzetqkr drtqgr.

---

\* **1:1** Korint nide taon kxmyapxbz mz Akaia Provins, mz nznngini-krde mzteadau ngrde. Mzli ka provins lc yc mz kandre kc Gris.

<sup>7</sup> X lxngiti-angidrkr kx natu-amqngi-kzamu, murde mz nzprtr-krmu mz nzetqkr drtqgu, nigu kxnzrlxngiting, sa naprtr-kzamu mz nzapqtr-krm Gct drtwrgr.

<sup>8-9</sup> Mzlengeng x inwengeng, nakrlz-angidramu kx mzli kc tqmnc-ngrgr mz provins kc Esia, leplz nzaetq-zlwzbzlr drtqgr. X nzxplr-krgr trtakitrdeu nztu-amqngi-krgr mz nzxpu-krgr lcng. X mz drtwrgr, ycpe pipz nzbz-krgr. A' Gct rlr-ngrmle da lcng, murde bzkq brti drtwrgr nzxplr-krgr esz'-krgr, a' nabrti drtwrgr nide kc tqatulzmlc leplz mz nzbzngr mz zmatq ngrde.

<sup>10</sup> Zbz mzli lc, Gct sc tqarlapxpele nigr mz nzbzngr. X abrtxtrpwzkr drtwrgr bade mz nzarlapx-zvz-krde nigr mz da kznikeng naprtzmqng bagr kalr.

<sup>11</sup> Murde mnc-xgle-kzkr nzprtr-krbzmu mz kztegunng mrkang kqlu mz nzkrka'-krbzmu mz Gct nzokatr-krde nigr. X mz nzayzlu-krbzle nzkrka'-krmu, nimu kxnzkqlung sa na-awin-grbzmu bade zmrlz ngrde kx avzomle bagr. ✧

*Pol Ayzlubzle Natq Leplz Kcng Tzrpilr Kx Da Kcng Tqpile Pokia-ngrde*

<sup>12</sup> Krlz-angidrx mz nabznge kx nqmqq krnge mz nzmnc-krgr badr leplz mrlz x tubq, myapxbz mz nzmnc-krgr. X abrtzlvzx da lc. Murde trvzpxpuu mz nzyrplapxkr leplz, a' vzpxm mz zmrlz ngr Gct kc tqokatrle ninge.

<sup>13</sup> Pibo da lc murde suti drtwrnge kx nakrlzamu kx da amrlx kcng tqyrbo bamu mz letz

scngeng nzopx-angidrng x tryrlq-kapqwxu drtwr ngrdr.

<sup>14</sup> Krlzmle mzli ka, kzdung nimu trnzkrlz-zpwxkalr kx nzmnc-krngu badr mrlz x tubq zvz, a' ycpe pipz nimu amrlx nzbrtikr drtwrmu ninge. X mzli kc nayzlu-ngrm Kxetu rgu Jiszs, sa naglqpx-lzbq-ngrnamu ninge, da kc tqwai nzglqpx-lzbq-krnge nimu mzli ka. †

<sup>15-16</sup> Mzli lc tqryr-ngrbo bamu, lxngitix kx amatqamu ninge, x pibo bamu kx nzoklati-krbo nimu nzwrde nali, mzli kc mz nzvz-krnge mz Masedonia Provins, x mzli kc nayzlu-ngrmc. Murde suti drtwrnge kx naokatramu ninge mz nzvzne-krnge Judiz Provins. X nzm na-alepex da lc, natwzpeamu da kxmrlz mz nzwrde lcng li, murde mz nzamrlz-krmu ninge, Gct sa na-amrlz-kzle nimu.

<sup>17</sup> Kxmule-esz', a' mz nibrde tekqtrix drtwrnge. A' trngiu drtwr ngrde kx nzymne-krnge ycmne-abeane. Murde mz nztekqtr-krnge drtwrnge, trvz-nqblqwxu da kx mrlzm bange, da kc tzwai kxtrnzrlxngitiung, a' vz-nqblqx me pnz drtwr Gct. Trpnzngr nzpokia-krnge mz nzrpi-krnge da kx na-alex.

<sup>18</sup> Da kc tqwaiamu mz nzbrtipekr drtwrmu Gct nzatutr-krde natqdeng, takitrde nzbrti-kzkr drtwrmu ninge, murde trpnzngr nzrpi-krbo

---

† **1:14** Mzli kc Gct naobqtr-ngrde mz nqm qrgu kalr, takitx-trpwzle nzglqpx-lzbq-krngu mz leplz kcng tqokatrku mz nzvz-nqblq-krdr Jiszs. Nzmu lr Korint nzokatr lr Pol mz nzkrka'-krdr nide, takitrde nzglqpx-lzbq-krdr mz nzngini-krde kxrmailz kxmrlz. X Gct sa na-amrlzle nidr mz nzokatr-krdr nide. A' nzm naptxpx-ngrdr nide, trnatwzlru nzamrlzkr Gct lc nidr.

bamu kx, “Eu” x “Trtingr” mz mzli kcpwz.

<sup>19</sup> Murde vz-nqblq-zvzx Jiszs Kxnmcpz, Mrlx Gct, x nigr badr Saelas x Timoti yapwxtipxbzkr nide bamu. X Jiszs trpnzngz nzrpi-krmle bagu kx, “Eu” x “Trtingr” mz mzli lcpwz, a' atutr-zvzle natq Gct mz nzmnc-krde.

<sup>20</sup> Mz nzwzkr Jiszs, Gct sa tqatutr-zvzle da amrlx kx esalz-ngrbzle mz leplz nedeng. X mz nzkriz-krgru da lc, glqlzku Gct mz nzrpi-krbzku bade kx, “Eu, da zpwxtx kx atutr-zvzq nzesalz-krmqng.”

<sup>21</sup> Sc tqamqngi Gct nzrlxngiti-krgru mz nzaxvctr-krbzle nigu mz Kxnmcpz. X mcpz-kzle nigu.

<sup>22</sup> X avzomle Mqngkxtr mz nzmncpz-krmle mz nabzgu, murde nangingide rix kx nigu leplz neng Gct kcng natwzlr da amrlx kcng tqesalz-ngmle bagu.

<sup>23</sup> X ni-kzde Gct kx krlzle kx trpokiawxu. A' tekqtrix drtwrnge mz nzoklati-krbo nimu nzwzrde krali, murde ma tqpnanati-moux nimu mz alwx ngrmung.

<sup>24</sup> Bzkq rpianu kx suti drtwrnge nzmncz-krmamu bange mz da amrlx. A' da kx suti txpwz drtwrnge nzwz-lxblr-krgru murde na-abrtzamu mz Kraes. X krlzx kx tu-amqngianu mz nzrlxngiti-krmu. ‡

---

‡ **1:24 1:19** Ncblo kc tqngi menrpa na-ale-zvzle da kx na-abrtzlvzngz kxetu rde nide, murde ma tzobqszo leplz badr kxetu rde. **1:22** Nzrlxngiti-krgru x nzwz-krgru kc tqaprcm Gct bagu nztuong mz nzxpkr Gct, a' trngiu mz nzxpkr-krgru esz'-krgru. **1:23** Pol pnanati-kaile nidr mz letz, murde namnc-zpwxng badr mzli kc tqoklati-ngrde nidr.

## 2

<sup>1</sup> Aoti zvx drtwrnge nzoklati-krbo nimu. A' pnz drtwrnge kx mrlz trnzoklati-krpou nimu mzli lc, murde ma tqbatrpo nzvzkr drtwrmu.

<sup>2</sup> Murde mz nzbatr-krbo nzvzkr drtwrmu mz nzpnanati-krnge nimu, drtwrnge vz kz. X trpnzngr kx na-aelalzmle drtwrnge.

<sup>3</sup> Mz nzm-krde lcde, yrbo letz lc bamu mz nzpnanati-krnge nimu, murde natekqtramu nqm q nr drtwrmu x sc tqoklati-atebo nimu. Kr-lzpx kx mz nzvz-nqblq-krmu natqnge lcng, dekc na-abrtzlvz-ngrne nqm q krmu x na-abrtzlvz-kz-ngrnamu ninge.

<sup>4</sup> Drtwrnge talvzo x yrni-kzx mzli lc tqyr-ngrbo letz lc bamu, murde alwx ngrmung x nqm q nr drtwrmu abaomle nabznge. Ryrbo bamu murde nakrlzamu kx mrlzti-zlwzx nimu, a' trngiu mz nzbatr-krbo nzvzkr drtwrmu.

### *Kztemung Kcng Tztekqtrlr Nqm q Ngr Drtwrdr Mz Alwx Ngrdrng*

<sup>5</sup> Mz letz kc pnz, pibo bamu kx na-ayrplapxamu ncblo kc tqbatrpzle nzcxpungr lcng. Trmrlzu nzrpi-krnge kx alwx rde etu zlwz, a' nzatrkatikrde nimu myaszpxle nzatrkatikrde ninge.

<sup>6</sup> Murde mzli ka tekqtrpele nqm q nr drtwrde. X nzayrplapx-krmu nide nayrkrpx.\*

---

\* **2:6** Mwx ncblo lcpwz dekc tqyapwxtipx Pol mz 1 Korint 5:1-5. Mz nzayrplapxkr lrmakxtr nide, nzmaszlrpx-ngrdr nide mz makxtr x ma nyzdr x trnzrlr-ngrpwzlr nuzprtr-krde mz Nzmungrkxtr. X nzkatxpxlr nide mz nzaclvekr Gct nide, mz nzaprc-krbzlr nide mz mq Setzn, murde natekqtrle nqm q nr drtwrde mz nzplzpx-krde alwx ngrde.

<sup>7</sup> Bzkcq yc zvz mz drtwrmu alwx rde, a' namrlztrpzmu drtwrde, murde nabzde ma tq-talvzo zvz x sc tqyrlqpx-lzbqpe-ngrde mz nzrlxn-gitingr.

<sup>8</sup> Mz nzmu-krde lcde, rngidrlvz-ngrbo bamu kx mrlx lc nakrlz-angidrle kx mrlzti-mouamu nide x suti drtwrmu nzprtr-mou-krde mz nzodutr-lxblr-krmu badr.

<sup>9</sup> Pnanati-ngrne nimu kz mz letz lc, mz nzobqtr-krnge kxmu nzvz-nqblq-krmu natq kx kapxbo bamu kx namnc-zpwxtr-ngrbzmu mz Gct.

<sup>10</sup> Vz-nqblqpeamu natqngeng mz nzayrplapx-krmu nide. X sc tqkrlzpex kx sa navz-nqblq-kzamu natqngeng mz nzipq-krmu nide. X mz nzipq-krmu nide, ipq-kzx nide. Kxnmcpkx krlzle kx ipqpex nide mz nzatrkatikrde ninge, murde ma tqrpwa'-ngrne nzaodu-mou-krmu nide.

<sup>11</sup> Mrlz nzale-krngu da lc, murde ma tqkabzku mz Setzn zmatq ngr nzatrkatikrde nigu murde pxtxpx-ngrngu nzipq-krngu mzlegu lc. Krlz-zpwxku kx Setzn vz zvz nzyrlq-krde drtwr ngr nzatrkatikrde nigu kxnlxngiting. †

<sup>12</sup> Atwzlr-ngrbo Taetus mz nzka-krbzle letz scnge bamu. X kzdung mzli mz nibrde, rlaszx taon kc Efiszs mz nzvz-krnge mztea Troas mz nzyapwxtipx-krbo Nrpakxmrlz badr, murde narmctix Taetus mrlcde mz nzyzlu-krmle bange.

✧ Mzli kc tqkrlz-ngrbo mrlc, kxmule-esz' leplz lcnng nasuti drtwrdr nzxl-krdr Nrpa ngr Jiszs,

<sup>13</sup> a' sc tqkx zlwz mz drtqnge nimu, murde Taetus trkrlzkaple Troas. X mzli kxpipzne

† **2:11** Kzdung mzli zyagox prtzbzle mz doa kx pxtxpx-ngrde nzipq-krde leplz. ✧ **2:12** Aposol 16:8



mnckr badr kxnzrlxngiti-ateng kcng mrlc, x sc tqvlaszpex nidr. X sc tqvzpex Masedonia provins mz nzmcti-krnge Taetus.

*Kxnzrlxngiting Nzaovxio-zvzlr Setzn Mz Nzaxvctr-krbzlr Mz Kxnzmcpx ‡*

<sup>14</sup> Sa naycmnetr-mou-ngrne da lc mz nibrde. A' mzli ka awi-ngrbo mz Gct kx kxmule-esz' da kx prtzm bange, a' aovxiox Setzn mz nzaxvctr-krbo mz Kxnzmcpx kc tqaovxiopole nide. X Gct okatrlle ninge mz nzyapwxtipx-krnge Nrpa ngr Kxnzmcpx drlve keng vzkix. X Nrpackxmrlz lc apule zsikapu ngr bqlr nc ninz kx mnrte mrlz zlwz kc tqlvabqtile mrkang kqlu.

<sup>15-16</sup> Mz drtwr Gct mnrte mrlz zlwz, murde abrtzlvzle nzyapwxtipx-krnge nrpa lc. X mz drtwr leplz kcng sa narlapxng, mnrtq nrpa lc mrlz zlwz kz mz nzxlr-krdrle, murde mailzle nidr mz nzlungr kxboi. A' leplz kcng sa naprtrng mz Hxl, nzpxtxpx-ngrdr nzxlr-krdr Nrpa ngr Jiszs, murde mz drtwrdr nrpa lc brtu apule namz kxmibi. X mz nzpxtxpx-krdr nrpa ngr nzlungr, nzprtrng mz nzbz-alongr. Trpnzng kx takitrde nzyapwxtipx-krde nrpa lc mz nzxplr-krde esz'-krde.

<sup>17</sup> Kzdung ncblo nzyapwxtipxlr nrpa ngr Gct, murde nartwz-ngrdr da kx nakabz leplz kcng

---

‡ **2:13** Mz 2 Korint 7:5 Pol ycmnetr-mou-ngrde nzvz-krde Masedonia Provins x nzmcti-krde Taetus. A' mz ngalrde lcng dcpz mz drtwrde kx kxmule-esz' kxne drtqde Taetus, a' Setzn trpnzng nzatrkti-krde nide. X Pol abrtzlvzle nzaovxio-krde Setzn. Murde kxmule-esz' trxprrkuu, a' zmatq ngr Gct mz zmrlz ngrde kxmyalz okatrlle nigu mz nzaovxio-krge Setzn x alwx.

tzabrtz-ngrdr nzalvztr-krdrng. A' nigr badr kztengeng trapukru nidr, murde nzryapwx-krgr trnartwz-ngrgru da kx nakamamu. A' mz nzwztr-krbzkr mz Jiszs Kxnmcpx, krlzkr kx Gct obqom bagr, x yapwxtipx-zpwxxr nrpa kc tqaprcmle bagr.

### 3

#### *Pol Nide Angidr Aposol Murde Nqm̄ Kr Lr Korint Mrlz*

<sup>1</sup> Bzq̄ rpiamu kx glqpx-lzbq-ngrne nzym-nengr lc. Trapukru kxnzeturng kcng tzrtwz-zvzm letz murde suti drtwrdr kx leplz nakrlzlr kx nzalvztr-krdrng tubq. Murde krlzpeamu nigr x nzwz-krgr. X tr-rlxti-kzpwxkru bamu nzryr-krmu letz mz nzokatr-krmu nigr.

<sup>2-3</sup> Murde nimu esz'-krmu apuamu letz kx yr Kxnmcpx mz nzaelwapx-krbzle mz leplz kx wztrpzkr mz Gct. Murde trmrbrtru mz drtwrgr kx mzli kc tqyapwxtipx-ngrbzkr Nrpakxmrlz bamu, Jiszs tekqtrle nabzmu. X alele da lc mz nzwzkr Mqngrkxtr kc tqatwzlr-ngrm Gct kxlu zvz. X opx-angidrbz mz leplz amrlx kcng tzkrlzlr nimu, kx atwzlr-kz-ngrm Gct nigr x nzalvztr-krgr tubq. Murde trapuwamuu letz kc tzlztr mz rplz, a' apuamu letz kxlu, murde nqm̄ nr nabzmu x nzmnc-krmu tubq. ☆

<sup>4</sup> Nzycmne-krbo kxmule lc murde brti drtwrgr kx Gct wz mz nabzmu mz nzaxvctr-krbzmu mz Kxnmcpx.

---

☆ **3:2-3** Jeremaea 31:33; Esikel 11:19-20; 36:26-27

<sup>5</sup> Krlz-angidrkr kx trpnzngr scgr zmatq esz'-krgr mz nztekqtr-krgr nabz leplz. A' zmatq ngr Gct txpwz kx tekqtrle nabzdr mz nzvzpx-krmle mz nzwz-krgr.

<sup>6</sup> Murde nide kc tqokatrle nigr mz nzyapwxtipx-krbzkr nrpa ngr Nzesz'tikr Drtwr Gct Kc Ate badr leplz kcng tqarlapxpele, mz nzabrtr-krbzlr drtwrdr mz Jiszs Kxnmcpx. Mz Nzesz'tikr Drtwr Kc Kai tqyrlqle mz Lou sc Mosis, leplz nanibqng mz nzxpqbrlr-krdr lou lcng. A' mz Nzesz'tikr Drtwr lc Tqate, leplz nalung mz zmatq ngr Mqngrkxtr.

*Nzesz'tikr Drtwr Gct Kc Ate Myaszpx-zlwzle Krkc Kai Mz Lou Sc Mosis*

<sup>7</sup> Krlzku kx lou lc mrlz tqrpile kx leplz kxn-zaleng alwx nabzng. Murde mzli kc Gct tqka-ngrbzle Loukxtr mz Mosis nzlztrng mz rplz kx nzmelxng, zluli r Gct sc tqayzlrpxpe-ngrde mz Mosis. A' lr Israel nzmwxlrtilr zmatq lc x nzpctxpx-ngrdr nzobq-krbzlr mz mzte. Delc tqakqlvztrngr Mosis mzte mz lrpz. A' zyzlr ngr mzte lc krlzle nzvzneo-krde.

<sup>8</sup> Delc, opx angidr kx nzmrlzkr Nzesz'tikr Drtwr Kc Ate tqyrlq Gct mz nzka-krbzle Mqn-grkxtr mz leplz, myapx-zlwzbx mz Nzesz'tikr Drtwr Kc Kai. Murde mz Krkc Kai ayzlr-ngrbzle mz Mosis, a' mz Krlc Tqate prtrku mz zluli r Gct.

<sup>9</sup> X krlz-kzku kx Lou sc Mosis lc mrlz tqaelwapx-ngrbzle mz leplz kx takitrde Gct nzayrplapx-krde nidr. X opx angidr kz kx nzmrlzkr Nzesz'tikr Drtwr Kc Ate myapx-esz'ngr murde Jiszs atubqtile leplz kxnzlxngitilr nide mz nzobqkr Gct.

<sup>10</sup> X mzli ka, nзму na-arsakrlr-ngrgu nзмrlzkr Nzesz'tikr Drtwr Kc Ate mz Lou sc Mosis, opxm kx Lou lc trpengr nзмrlz-krde, murde Krkc Tqate mrlz-esz'ngr.

<sup>11</sup> X mou, krlz-kzku kx Lou lc mrlz, kxmule-esz' nayrkrpxpe. X opx angidr kz kx nзмrlzkr Nzesz'tikr Drtwr Kc Ate, myatxpx-zlwzbz mz Krkc Kai, murde yc alo.

<sup>12</sup> Mz nзму-krde lcde, nelzgr br mz nzryapwx-pxngr, murde krlzkr kx nrpa scgr lc tqyc zvz, a' nrpa sc Mosis nayrkrpxpe.

<sup>13</sup> A' trapukru Mosis kc tqakqlvzle nyzlрpxkr mzte, murde lr Israel ma tzmclr nzvzneo-krde.

<sup>14-16</sup> Mzli lcde, batrpz Gct nzmqngikr nardr, x nardr trpnzngr nzyrplatitr-krdr drtwr ngr natqdeng, krlzmle mzli ka. Murde mzli kc lr Jiu tzrlwx-ngdr Nzesz'tikr Drtwr Kc Kai mz Nzryrn-grkxtr Kc Kai, trtwzlru drtwr ngrde, murde kzdq kc da akamrbr-ngrbzle nzaо-krdr drtwrdr, da kc tqwaibzle mz kxtrngiulrJiu. A' mzli kc leplz tzabrtr-ngrbzlr drtwrdr mz Kxetu Jiszs, Mqngrkxtr okatrle nidr mz nзrkatx-krde da kx akamrbr-ngrbzle nzaо-krdr drtwrdr.

<sup>17</sup> Murde tqngi Mqngr Kxetu rgu kc tqwz mz nzbzgu. X Mqngrkxtr lc aopxbzle drtqgu murde trnamnclzpepwzkuu mz zmatq ngr Lou sc Mosis x alwx.

<sup>18</sup> X mzli ka, nigu amrlx kcnг tzrlxngiting krlzku nзмrlzkr nqmг kr Kxetu Jiszs, murde trpengr da kx akamrbr-ngrbzle nqmг nr drtwrgu. X mz nzaotikr drtwrgu Kxnzmcpх, Nzryrngrkxtr apule dzpq, kc tqaelwapx-ngrmle mqngrde bagu. X Mqngrkxtr tekqtr-ebir-ngrde nigu, mz nzapu-

krġu Jiŝs. X nzaelwapx-krġu nzmrlzkr nqmġ krde sc tġetunepx zvx.

## 4

### *Nqmġ Krġu Nzaelwapx-nġrdr Kx Gct Mncpxm Bagu*

<sup>1</sup> Trpnzngŕ nztalvzokr nabzgr mz nzyapwxtipx-krġr Nrpakxmrlz, murde Gct yc zvx mz drtwŕde nigr x okatrle nigr.

<sup>2</sup> X nqmġ krġr tubġ mz da amrlz murde yrlqpx-lzbġgr mz da kx myangŕ drtġ. X da amrlx kx alekr takitrde leplz nzmc-krdrleng. Tresabrtikru leplz murde nalalztqmġng bagŕ o naokatrlŕ nigr. X trpnzngŕ nztekqtr-krġr nrpa nġr Gct. A' yapwxtipx-zpwxkr nrpa angidr, murde krlzkr kx Gct sa tqobġom bagŕ. X krlz-kzkr kx leplz kxnztubġng sa namclŕ kx nzalvztr-krġrng tubġ.

<sup>3-4</sup> A' mzli lcpwz, Setzn, kc tqaclvele nrlc, ayr-putrpzle drtwŕ kzdung leplz, murde ma tztwzlr drtwŕ nġr Nrpakxmrlz. Leplz lcnġ sa napŕtrng mz Hxl, murde trnzkrzlru kx Jiŝs Kxnzmcpx myapx-esz'nġr mz nzaotr-angidr-krde Gct.

<sup>5</sup> X Jiŝs Kxnzmcpx lc tqyapwxtipxkr mz nzngini-krde Kxetu kc tqaclve-zvxle leplz amrlx. A' trycmnetŕ-nġrgru nigr esz'-krġr, a' nġi txpwz mz nzŕpi-krġr kx kġle Jiŝs nigr mz nzwztr-krbzkr bamu.

<sup>6</sup> Mzli kc tqwzngŕ Gct nrlc, rpilc kx, "Zyŕlŕ nayzlrpx-nġrm mz nzlo." ☆ Mz nqmġ lcpwz, Gct katxde da kx akamŕbr-nġrbzle nqmġ nr drtwŕġu, mz nzayzlrpx-kŕmlc nzalvztrnġr angidr

---

☆ 4:6 Nou 1:3

mz drtwrgu, murde nargu nayrplatitrlr drtwr ngr nrpa ngrde. X mzli ka mz nzkrllzpe-krgr Jiszs Kxnmcpx x nqm qrdeng, nakrlz-kzku kx nqm qrdeng kr Gct mrlz-esz'ngr.

<sup>7</sup> Krlzkr nzmrlzkr nqm qrdeng kr Kxetu Jiszs x nzyapwxtipx-krgr da lc ngi da kxbrngz-esz'ngr. X kxmule-esz' nigr leplz txneng x nrkrdrtrgr yangrng, mz nzapu-krdr dis kx mrglc ani, a' Gct aprcmle nzwzngz lc bagr. Alele da lc mz nzaelwapx-krde kx zmatq ngr Nrpa ngr Jiszs mz nztekqtr-krde leplz, trvzpxpuu mz zmatq ngrgr esz'-krgr mz nzyapwxtipx-krgrle, a' vzpxm mz Gct.

<sup>8</sup> Dekc nzxpxngr kxkqlu tqprtzngrmlr bagr, a' trnzaovxiolru nigr. X nzwrdde kqlu kx nabzgr talvzo-ngrdeng, a' drtwrgz trmau.

<sup>9</sup> Nzaetq zvz drtrgr, a' Gct mnc-zvzm bagr. Nzwrdde kqlu kx nztz-ngrgr, a' trbzkr.

<sup>10</sup> Drive keng vzkikr, prtrkr mz nzatrkatngz keng pwz tqprtzbz mz Jiszs. X rlrpx-lzbqgr mz nzbz-krgr, da kc tqwaile, murde leplz nakrlzlr kx zmatq kcpwz tqalu-moule Jiszs, dekc tqwz mz nabzgr x nrkrdrtrgr. ✧

<sup>11</sup> Mz nzwztr-krbzkr mz Jiszs mz nzlu-krgr, Gct sc tqrlr-ngrmle bagr nzprtr-krdr mz da kxkqlu kx nabatrpxle nzbz-krgr. Murde suti drtwrdde kx leplz nakrlzlr kx Jiszs lupe mou x zmatq ngrde dekc tqwz mz nrkrdrtrgr kxyangrng, mz nzokatr-krde nigr mz nztu-amqngi-krgr kxmule-esz' da kx prtz.

---

✧ **4:10** Matiu 16:24-25; Mak 8:34-35; Luk 9:23-24; Rom 8:17; 2 Korint 1:5; Filipae 3:10; 1 Pita 4:13

<sup>12</sup> Delc tqrlrpx-lzbq-ngrgr mz nzbzngr murde naprtramu mz nzlungr kxboi.

<sup>13</sup> Apukr ncblo kc tqrpilē kx, “*Pipxx murde abrtrpo drtwrnge mz Yawe.*” ✧ Murde pipx-zvz-kzkr nrpa ngrde mz nzabrtr-krbzkr drtwrgr bade.

<sup>14</sup> X krlzkr kx nide kc tqatulz-mople Kxetu Jiszs mz nzbzngr. X kxmule-esz' nznibqgr, a' mz nzaxvctr-krbzku mz Jiszs, sa na-atulz-kz-mople nigu mz nzlungr kxboi, x sa navzmile nigu mz nzmncr-krbzku bade Heven.

<sup>15</sup> Da lcng amrlx tzprtzmqng bagr ngi dalr nzokatrngr nimu x leplz kc-kzng tqalvztrkr. Murde mz nzkqlunepxkr leplz kcng tzlxngitilr nzmrlzkr Nrpa ngr Jiszs, nzawi-krbzlr mz Gct x nzangio-krdr nide naetunepx kz.

<sup>16</sup> Delc nabzgr trtalvzou mz nzwztr-krbzkr mz Gct. Murde kxmule-esz' nrkrdrtqgu vztrpem, a' Gct sc tqaxplr-zvzle nabzgu mz zbq kang kqlu.

<sup>17</sup> Mz nzobqtipx-krgru nzetukr da kxmrlzt-ing amrlx kx natwz-aloku Heven, nzaetq-krmlr drtqgu mz nrlc ka topwz, x mzli rde mrbcnepwz.

<sup>18</sup> Mz nzmu-krde lcde, traotiu drtwrgr da kx prtzm mz nrlc ka, murde sa naykrpxng. A' aoti txpwz drtwrgr da kx naprtzm Heven murde sa nayc-along.

## 5

<sup>1</sup> Nrkrdrtqgu mz nrlc ka nzapulr matelq, murde sa nabzng. A' krlzku kx Gct sa naka-mople bagu nrkrdrtqgu Heven kx na-apulr ma kx tu-amngi murde trnzbzung.

---

✧ 4:13 Sam 116:10

<sup>2</sup> X mz nzmnc-krgru mz mzlir nzxpungr mz nrlc ka, batrple bagu nzsuti-zlwzkr drtwrgu nztwz-mou-krgru nrkrdrdq lcng kx trpnzngz nzkxpu-krdr.

<sup>3</sup> Murde mz nzbzkr nrkrdrdqgu mz nrlc ka, mqngrgu sa narmctilr me namnc-ngzdr mzli kc natwzpe-mou-ngzgu nrkrdrdq lcng.

<sup>4</sup> A' mz nzmncbe-krgru mz nrkrdrdq lcng tr-rblxu nzbz-krdr, yrni-zvz-ngzgu zvetq. X mzli lcpwz, trsutiu drtwrgu nzbz-krgru, a' suti drtwrgu kx nrkrdrdqgu lcng nalrtipxng mz nrkrdrdq kx tretqu, murde sa nalu-along.

<sup>5</sup> Gct yrlq-pnzle drtwr kx sa naka-mople bagu nrkrdrdq lcng kalr. X batrple bagu nzsutikr drtwrgu nrkrdrdq lcng. X amncpxmle Mqngzkrxtr mz nabzgu nangi rkx kx sa na-atutrle nzesalz-krdeng.

<sup>6-7</sup> Delc krlzku kx sa natwzku nrkrdrdq kzbleng lcng kalr. X brti drtwrgu kx Gct sa na-atutrle nzesalz-krdeng amrlx, kxmule-esz' trmckaku. X trpnzngz nzprmitr-krgru nrkrdrdqgu lcng tr-rblxu nzbz-krdr Heven. Mz nzmu-krde lcde, obqtipxku nzyrlqtxo-krgru nrkrdrdq mz nrlc ka, mz nzvz-krbzku mz Kxetu Heven, kc tqngi mrnyzgu angidr.

<sup>8</sup> X trmwxlrtikru nzbzngz, murde mz drtwrgz nzmnczr-krbzku mz Kxetu Heven myaszpxle nzmnc-krgr mrka.

<sup>9</sup> Kxmule-esz' mnckr mz nrkrdrdq mz nrlc ka o yrlqtxokrng mz nzvztr-krgr Heven, a' da kx myapxbz mz drtwrgz nzaelalz-krmgz drtwr Kxetu mz da amrlx.



<sup>10</sup> Murde mzli kc nigu amrlx kxnzrlxngiting natutr-ngrbzku mz mz Kxnzmcpx kalr, sa na-ayzlumle da bagu mz nzvz-nqblq-krde da kx alekung mz nrlc ka, kxmule-esz' mrlz o trka. \*

<sup>11</sup> Mz nzmyatitr-krgr Gct, dekc tqabz-ngrgr nzngi-batr-krbzkr bamu nzkriz-krmu kx nqm q krgr mrlz x takitrde nzmnciz-krmamu bange mz nzngini-krnge aposol x mz nzlxngiti-krmu nrpa angidr. Gct krlzle kx nqm q krgr mrlz x kqlele nigr mz nzwzng r lc. X lxngitix kx krlz-kzamu da lc mz nabzmu.

<sup>12</sup> Mz nzycmnengr lc trglqpx-lzbq-ngrgru. A' ngi dalr nzayzlu-krbzmu natq leplz kcng tza-trkatilr nqm q krgr, mz nzrpi-krbzmu badr kx abrtzlvzamu nigr. Murde leplz lcng nzglqpx-lzbqng mz da kx nzmc leplz, a' traotiu drtwrdr nqm q nr nabzdr.

<sup>13</sup> Kxmule-esz' nzrpilr ngqngukr, a' nzngqngu-krgr ngi dalr nzaelalz-krmgr drtwr Gct, murde wztrpzkr bade. X mz nzrpi-angidr-krbzkr da bamu ngi dalr nzokatr-krgr nimu.

<sup>14</sup> Murde nivz lr Kxnzmcpx mailzle nigr mz da amrlx kx alekr. Murde mz nivz lrde, bz-ngrde leplz amrlx. Delc nigu leplz nedeng prtrku mz nzbz-krde. ☆

<sup>15</sup> X mz nzbz-krde leplz amrlx, atulz-mop Gct nide mz nzbzng r. Murde suti drtwr Gct kx leplz kcng tzprtrng mz nzlungr kxboi mz nzlxngiti-krdr Jiszs bzkq nzvz-nqblqpelr me pnz drtwrdr

---

\* **5:10** Kxnzrlxngiting kcng tzaleng da kxmrlz sa natwzlr da kxmrlzting, a' krkcng trnzaleung da kxmrlz trpnzng r da kx natwzlr, a' nangi txpwz nzlungr kxboi. [Sam 62:12] ☆ **5:14** Galesia 2:20; 1 Timoti 2:6; 4:10; Rom 6:3-11

esz'-krdr, a' navz-nqblq-alzulr me pnz drtwrde.

<sup>16</sup> Mz nzm-krde lcde, mzli ka nzaolvz-krgr leplz trpengr nzvz-nqblq-krde drtwr kxtrnzrlxn-gitiung, a' nzaolvz-krgr nidr navz-nqblqle drtwr Kxnmcp. Mzli kc tr-rlxngitika-ngrgr, aolvzkr Kraes mz nzvz-nqblq-krde drtwr kxtrnzrlxngitiung. A' mzli ka krlz-angidrpekr nide.

<sup>17</sup> Leplz amrlx kcng tzabrtrpzlr drtwrdr mz Kxnmcp nzteqtr-atwrnrpe-ngrng. Murde Gct tekqtrle nqm q krdrng kxblzlongr kxtrka mz nqm kzbldng kxmrlz.

<sup>18-19</sup> Sc tqale Gct da lc, murde Jiszs Kxnmcp bz-ngrde nigu badr leplz amrlx mz nrlc. X dekc tqyzlumi-mop Gct nigu mz nzmnc-zpwx-krgr badr. X aprcmle bagr nzwzngr mz nzyapwxtipx-krbzkr da lc. Rpibzkr badr kx Gct sa tqipqpx-zvzle alwx ngr krkcng tzplzpxbzlr alwx ngrdr bade mz nzabrtr-krbzlr drtwrdr mz Kxnmcp kc tqbz-ngrde nidr. Murde Gct suti drtwrde namnc-zpwx-moung badr.

<sup>20</sup> X nigr menrpa neng Kxnmcp murde pipxbzkr natqdeng mz leplz. Apule Gct yrnititripzle bamu, mz nzrpi-krbzkr bamu kx, "Natekq-tramu nqm nr drtwrmu, murde namnc-zpwx-mouamu badr mz nrwx."

<sup>21</sup> Kraes tubq murde trpnzng alwx ngrde. ✧ A' Gct rlr-ngrbzle bade nzayrplapxng nide mz nzxpe-krde alwx rgung amrlx, murde natubq-kzku mz nzobqkr Gct mz nzaxvctr-lzbq-krbzku mz Kraes. ✧

---

✧ **5:21** Hibru 4:15; 7:26; 1 Pita 2:22; 1 Jon 3:5 ✧ **5:21** Asaea 53:6; Rom 3:21-26

## 6

<sup>1</sup> Prtrpeamu mz zmrlz ngr Gct kxmyalz mz nzarlapx-krde lc nimu. X mz nzwz-lxblr-krgr badr Gct, rngidrlvz-ngrbzkcr bamu kx bzkq ma mz drtwrmu zmrlz lc, a' rlr-ngrbzmu bade nzokatr-krde nimu nzrvz-nqblqngr nide.

<sup>2</sup> Rpi pnz Gct mz Nzryrngrkxtr kx, “Mz mzli kx mrlzm bange, sa na-ayzlu-ngrbo da kx rlxti-mamu bange, murde naokatrix nimu mz mzli r nzrlapxngr.” ✧ Nakrlzamu kx mzli ka, mzli kx mrlzpebz mz Gct mz nzarlapx-krde leplz, murde sc tqatwzlrpe-ngrmle Mevalu Kxnmcpix mz nrlc, x suti drtwrde kx na-abrtrpzmu drtwrmu bade mzli ka.

### *Nqm q Kr Leplz Kcng Tzwztrpzng Mz Gct*

<sup>3</sup> Nigr badr kztengeng trpnzngr nzale-krgr da kx nabatrpzle mz leplz nzpptxpx-krdr nzxlr-krdr Nrpakxmrlz.

<sup>4</sup> X aelwapx-ngrgr kx wztr-angidrbzkcr mz Gct, murde tu-amqngikr mzli kc tqprtr-ngrgr mz nzaetqngr drtqgr, nzxpxu-krgr, nzvztx-zlwzkr drtwrgr,

<sup>5</sup> nziklatingr nigr, nzadwatrngr nigr mz presin, x nztutilz-lzbqkr zbo ngr leplz kcng tizrmaneut-ing nigr murde nanibqlr nigr. X vz zvz nzbr-tikr drtwrgr Gct mzli kc tqwz-kato-zvz-ngrgr, trmwikru, x nelzgr brtale zvz.

<sup>6</sup> Suti drtwrgr kx Gct na-abrtzlvzle nigr mz da amrlx. Mz nzm-krde lcde, nzmnc-krgr tubq,

---

✧ 6:2 Asaea 49:8

krlzkr nzmrlzkr nqm̄ krdeng, x drtwrgr trngya-anipwzu mz leplz, a' okatrkr nidr mz nivz angidr mz zmatq ngr Mqngrkxtr.

<sup>7</sup> Alvztr-ngrgr Nrpa ngr Kxnmcp̄x mz zmatq ngr Gct x mz natq angidrng. X nztubq-krgr apule toki r vea mz m̄qgrng. Murde rblxbz mz leplz nzatrkatikrdr Nrpakxmrlz mz nzpipx-krdr kx nqm̄ krgr trka. X krlzkr nzaovxiongr leplz amrlx kcng tzrpilr narpwa'-ngrdr nzvzpxkr Nrpa lc.

<sup>8</sup> Wztr-angidrbzkr mz Gct kxmule-esz' nzglqpx leplz nigr o nzp̄txpx-ngrdr nigr, kxmule-esz' nzabrtzlvzlr nigr o nzpibqtilr nigr, x kxmule-esz' nzrpilr nigr kxnpokiang, a' yapwxti-zvzkr da angidr.

<sup>9</sup> Kzdung leplz nzkrzlzlr kx wztrpzkr mz Gct, a' kzdu-kzng leplz nzp̄txpx-ngrdr nigr. Nza-yrplatipxl̄r nigr x nzrpilr nanibqtilr nigr, a' trbzkr.

<sup>10</sup> Nzavztibzlr drtwrgr, a' drtwrgr elalz-ngrmle Kxetu rgr. Kxmule-esz' trpnzngr scgr da, a' prtr-kzkr mz da kxmrlzting amrlx kx kam Gct bagr mz nzaxvctr-krbzkr mz Kxnmcp̄x. X okatrkr leplz mz nzprtr-kz-krbzlr bade.

<sup>11</sup> Mzlengeng x inwengeng lr Korint, aelwapx-ngrbzkr bamu kx mrlzti-zlwzkr nimu x trpnzngr da kx yrlq-kapq̄bzkr bamu mz nzpipx-krbzkr bamu nivz kx yc mz nabzgr.

<sup>12</sup> X trpnzngr me lolvz-moukr mz nivz lc. A' trka-atwrnr-ngrpwa'muu nabzmu bagr, mz nzmrlzti-kz-krmu nigr.

<sup>13</sup> Apuamu doa nengeng. X pibo da lc mz nzapu-krbo bamu trtemu. Takitxtrde nzayzlu-kz-

krpwzmu nivz lc bange.

*Bzkq Axvctr-lzbqzmu Mz Kxtrnzrlxngitiung*

<sup>14</sup> Bzkq axvctr-lzbqzmu mz kxtrnzrlxngitiung, mz nzmncz-krbzmu badr mz nzwzng o mz nzyrlz-krbzmu badr, murde ma tqprtrkzamu mz alwx ngrdrng. Murde leplz kxntubqng kcng tzvz-nqblqlr nqm q kr Gct trtakitrdeu nzaxvctr-lzbq-krbzlr mz kxdrka'-ngrng kcng tzvz-nqblqlr nqm q kr Setzn. Da kc tqwai zyzlr x nzlo trnzkrzlru nzyctr-lxblr-krdr me esz'.

<sup>15</sup> Trpnzng nzesz'tikr drtwr mz Kxnmcp x Setzn. Mz nzm-krde lcde, trpnz-kzng nzesz'tikr drtwr kxnzrlxngiting badr kxtrnzrlxngitiung mz da kxtubq.

<sup>16</sup> ?Myx kxmule, takitrde mqngr drka' kxnz lz nztupx-krmleng Mangr-nzangiongr Yawe? Bzkqtx pnz! Mz nqm q lcpwz, trtakitrdeu nigu kxnzrlxngiting nzaxvctr-lzbq-krbzku mz kxtrnzrlxngitiung. Murde nigu Mrkc Tqtr nyz Gct mz nzmncpx-krmle elr. Rpile mz Nzryrngrkxtr kx, *“Sa namncpxmc mz leplz nengeng x mz mzlirdr. Sa nangingibo Gct rdr, x nangingidr leplz nengeng.”* ✧

<sup>17</sup> Dekc tqrpi-kzle kx, *“Prsrpxamu kxdrka'ngr lcng, x akipx-lzbqmu badr, murde ma tqbatrpzle trnztakitr-krdeu nimu mz nzprtr-krmu mz nzan-giongr. ✧ Aleamu da lc x sa na-abrtzlvzx nimu.”* ✧

---

✧ **6:16** Liva 26:12; Jeremaea 32:38; Esikel 37:27 ✧ **6:17** Asaea 52:11 ✧ **6:17** Esikel 20:34

18 X rpi kz Yawe kc tqrninr kx, "Sa nangingibo Trtemu, x nangingimu mrlxngeng x inyxngeng."  
 ☆

## 7

1 Mzlangeng x inwengeng, mz nzaotikr drtwrgu da lcng tqesalz-ngrmle bagu, naesakipe nzale-krqu alwx amrlx, kxmule-esz' mz nrkrdrtrqgu o mz nzaokrgu drtwrgu. X mz nzmyatitr-krqu Gct, nztubqkr nzmnc-krqu naetunepx zvz.

2 X yrnititro bamu nzayzlu-kz-krmamu bagr mz nivz lrmu. Murde trpnzngr nimu kx atrkatikr, trpnzngr nimu kx alvztr-rbrkr, x trpnzngr nimu kx esabrtikr mz nztwz-krgr dz-tudrng.

3 Trycmne-ngrpou lc murde na-amyatibo drtqmu. A' da kc tqwai nzpi-krbole bamu mzli kc, kx nzmrlzti-krgr nimu sa navz zvz, kxmule-esz' bzku o luku.

4 Pipxpebo da kx yc mz nabznge, murde brti drtwrnge nimu. X glqpx-lzbq-ngrne nimu mz nzvz-nqblq-krmu Kxetu. X apqtrple drtwrnge mz nzpi-krm Taetus bange kx vz-nqblq-angidramu natqngeng mz letz kc kai. Abrtzlvzx nimu, kxmule-esz' prtizle nigr nzkx-pungr kxkqlu.

### *Nzrlwakr Taetus Lr Korint Kxnzrlxngiting*

5 Mz nibr nzkrz-krbzkr provins kc Masedonia, trmnc-zpwxkru murde tr-rmctikru Taetus mz nzyzlu-krmle bange. Mzli lcde nabzgr talvzotx

---

☆ 6:18 2 Samwel 7:14; 1 Be Ngrdr 17:13; Hosia 1:10; Jon 1:12

zlwz, murde rmctikr nzkxpungr mrkang kqlu, x mrlcdeng amrlx leplz otabrkr badr mz nzym-nengr. X mwxlr-ngrgr drtwrgr nzlitr-krbzle mz Taetus mz nzatrkangr nide, x kx kz mz drtqgr kxnamu nzayzlu-krmamu letz scenge.

<sup>6</sup> A' mz nibrde, Gct kc tqapqtrpzle drtwr leplz kx nabzdr talvzo, apqtr-kzple drtwrgr mz nzvz-krm Taetus.

<sup>7</sup> X Taetus aelalz-zlwzmle drtwrgr mz nzrpi-krmle bagr kxmu nzapqtr-krbzmu drtwrde. Murde rpimle bagr kx sutitx zlwz drtwrmu nzoklati-krbo nimu, x drtwrmu vztz-ngrde kx-musrnamu ninge mzli kc, x mzli ka vqti drtqmu nzmncz-krmamu bange mz nzngini-krnge aposol ngrmu.

<sup>8-12</sup> X mzli ka abrtz-ngrne nzyr-krbo letz lc, murde aturle me pnz drtwrnge mz nzbatr-krbzle bamu nzkrlz-krmu kx mrlzti-angidramu ninge x amatq-angidramu ninge. X okatrle nimu murde narmu nalvxpxbzle mz nzale-krmu da kxtubq. X atwzlr-kz-ngrpo letz lc mz nzatubqti-krnge ncblo kc tqvz-rbr x mz nzokatrngr leplz kcng tqatrkatile. Kxmule-esz' pnanati-zlwzx nimu mz letz lc, a' mz nzyr-krbole, drtwrnge vz murde krlzx kx sa na-avz-kzpzle drtwrmu. X nzvzkr drtwrmu lc, krlzle nzyrkrpx-krde mz da kxtrka o da kxmrlz. Murde mzli kc drtwr leplz tqvz-ngrde x aoti txpwz drtwrdr da kxtrka lcng x nzpxtpx-ngrdr nztekqtr-krdr nqm q nr drtwrdr, krlc da kx na-akipx-lzbq-ngrdr badr Gct x batr pzle nzvz-krdr mz nzbz-alongr mz Hxl. A' mzli kc nzvzkr drtwr leplz tqbatr-ngrbzle nzavzo-lzbq-krdr x nzyzlu-krbzlr mz

Gct, krlc da kx na-ayrkrpxle nzvzkr drtwrdr mz nztekqtr-krdr nqm̄q nr drtwrdr. X awi-ngrbo mz Gct kx mz nzvzkr drtwrmu, yzlutiamu nide x sc tqtekqtrpeamu nqm̄q nr drtwrmu. Murde da kxmrlz kxkqlu kx nzvzpxmqng elr. Aesakipeamu nzale-krmu da kxtrka. X drtqmu myape-ngrde nqm̄q lcng tqtrka. X amatqpeamu ninge mz nzngini-krnge aposol. X mzli ka sutitx zlwz drtwrmu nzmnc-lxblr-kr̄gu. X sc tqrpwa'pe-ngrbzmu mz leplz nzpibqti-krdr ninge. X sc tqayrplapxpeamu ncblo lc tqvz-rbr. Da lcng amrlx nzaelwapx-ngrdr kx drtqmu vq mz nzatubqti-lzbq-krmu mz nzvz-rbr-krmung. Mz nzm̄u-krde lcde, drtwrnge trvzpeu mz nzyr-krnge letz lc, a' drtwrnge elalz-zlwz pem. Murde vztx-ngrpwz drtwrmu mzli m̄rbcne x letz lc batrpzle nzyzlu-krbzmu mz Gct, a' trbatrpwzleu nzesablqti-krmu nide.

<sup>13</sup> Da lcng amrlx nzapqtrplr drtwrgr. X abrtz-zlwz-ngrgr nzabrtzkr Taetus mz nzoklati-krbzle nimu, murde nimu amrlx apqtrpzmu drtwrde mz nqm̄q krmu.

<sup>14</sup> Mzli kc narkalzpe-ngr̄mle, pibo mz Taetus kx glqpx-lzbq-ngr̄ne nimu, murde lxngiti-angidramu x vqti drtqmu nzwztr-krbzmu mz Gct. X mzli kc tqkrlzpe-ngr̄bzle nimu, tramyatipwamuu drtq̄nge, a' mc̄le kx nike pibo bade da angidrtx, da kc tqwai mz da kcng amrlx tqpitibong bamu.

<sup>15</sup> Nzmr̄lztikr Taetus nimu etunepx mz nzaotikr drtwrde kx drtqmu vq mz nzm̄nclz-krbzmu mz zmatq ngrde x amatq-zlwzamu nide mz nzngi-krde menrpa nenge.



<sup>16</sup> X mzli ka, abrtz-zlwzpepex murde drtwrnge brpe kx sa na-ale-zvzpeamu da kxtubq.

## 8

### *Nzatakqtingr Trau Mz Nzwzkr Lrmakxtr*

<sup>1-2</sup> Mzlengeng x inwengeng, suti drtwrgr nakr-lzamu nqmq kr dzbe lrmakxtr kcng mz Masedonia Provins. Murde mz nzvz-nqblq-krde zmrlz ngr Gct kxmyalz, drtwrdr elalz-zlwzm mz nzrkanrbalq-krdr da kxkqlu mz nzokatr-krdr kztegungr lr Jiu kcng Jerusalem kx trpnzngr scdr da. X nza-lelr da lc kxmule-esz' nidr esz'-krdr trpnzngr scdr da x kxtrnzrlxngitiung nzaetq-zlwzble drtqdr.

<sup>3</sup> Napi-zpwxbo bamu kx nzkapxlr da kxkqlung. X mzli ka nzmnc-xglenepwzlr da kxpipzne. Trpnzngr kx rpibz badr nzale-krdr da lc, a' pnzpe drtwrdr esz'-krdr.

<sup>4</sup> X nzrlxtitx-zlwzmlr bagr nzrlr-krbzkr nzprtr-krdr mz nzatakqtingr lc, murde naokatr-kzlr dzbe lrmakxtr kcng Jerusalem.

<sup>5</sup> Mz drtwrgr nakatxpxpwzlr trau kxpipzne. A' sc tzmyaszpxpelr mrkc tqpnz drtwrgr. Murde mzli kc kai nzrlrpx-lzbqbngr mz Gct mz nzale-krdr me pnz drtwrde. X mz nibrde nzrlxtimlr bagr nzpi-krbzkr badr nike na-alebzlr bade. X sc tzkapx-ateng trau kxkqlu.

<sup>6</sup> X nzrka-nrbalq-krdr da adcpyle drtwrnge mz nimu x nqmq krmu. Delc tqrtulrtr-ngrbole mz Taetus mz nzyzlu-krbzle bamu mz nzokatr-krde nimu nzayrkrpx-krmu nzatakqtingr lc. Murde nide kc tqyzutrpzle nzwznggr lc bamu mz yiz kc tqvztxpe.

<sup>7</sup> Sc tqwz-angidrpeamu mz zmatq kxkqlu mz nzwztr-krbzmu mz Gct. Murde wz-angidrpeamu mz zmatq ngr nzrlxngitingr, nzrplzpxngr nrpa kx kabz Gct, nzrpipxngr nrpa ngr nzrkrlzngr, x drtqmu vq mz nzokatrngr. X mrlztiamu nigr mz nivz kc tqaelwapx-kai-ngrbzk bamu. X mzli ka takitrde nzwz-angidr-kz-krmu mz zmatq ngr nzrka-nrbalq-ngrbz da mz leplz kx trpnzngr scdr da.

<sup>8</sup> Krlc trngiu natq kx rngidrlvz-ngrbo bamu. A' suti drtwrnge kx drtqmu navq kz nzrka-nrbalq-krbzmu da mz leplz mz nzaelwapx-krmu kx mrlzti-angidramu nidr, da kc tzwaipe lr Masedonia kxnzrlxngiting.

<sup>9</sup> Murde Kxetu rgu Jisz Kxnzmcpax aelwapx-ngrbzle zmrlz ngrde kxmyalz bamu. Rlaszmlc Heven mz nzngini-krde bcnyr elr, mz nzngini-alzu-krde kxtr-rngiscu mz nrlc, murde naprtr-kzamu mz da kxmrlzting sc Gct kcng tzvzpxmqng mz nzwz-krde kx etq-nrbalqngr drtq mrka.

<sup>10-11</sup> Mz yiz lc tqvztxpe nimu lr Korint yzutr-kaiamu nzatakqtingr trau lcng. X drtqmu vq zlwwz nzale-krmule. A' na-ayrkrpxamu nzatakqtingr lc mz nzrka-mou-krbzmu trau kznike ycpzbz bamu mzli ka. Murde nzvqtikr drtqmu lc mz nzale-krmule navz zvz nakrlzbzle nzayrkrpx-krmule. Pibo da lc mz nzokatr-krnge nimu.

<sup>12</sup> Gct suti drtwrde kx navqti drtqmu nzrkapxngr da. X mz nzvqkr drtqmu lc, abrtzlvzle nzrkapx-krmu da, mz nzvz-nqblq-krde da kx ngiscmu, kxmule-esz' doa kx esz' kapxle da kqlu o pipz.

<sup>13</sup> A' trsutiu drtwrnge nzkapx-krmu da kxkqļu x trpnz-alzungr kx nangi scmu. A' nimu amrlx narngisc-kzpu da kx natakitrde nzmnc-xgle-krmuleng.

<sup>14</sup> X mzli ka mz nzrngisc-krmu da kxkqļu takitrde nzokatr-krmu kx trpnzng r scdr da. X mz kzdu mzli kx natakitrde, sa na-ayzlu-kzpzlr bamu.

<sup>15</sup> Murde Nzryrngrkxtr mz nzymnetr-krde mz dakxnzng kx atwzlr-ngrm Gct lzke, rpile kx, *“Doa kx rtwz dakxnzng kxkqļu, bzkq ngi natxpwzle esz'-krde. Murde doa kx rtwz dakxnzng kxpipz, narngina kz dakxnzng kx namnc-xglele.”*

☆

<sup>16-17</sup> Rtulrtr-ngrbzk r Taetus nyzylu-mou-krbzle bamu. X angqlzlvzle drtwr lc, murde aotipe kz drtwrde nzale-krdele. X awi-ngrbo mz Gct nzbatr-krbzle nzvqtikr drtqde nzokatr-krde nimu mz nzatakqtingr lc, da kc tqwai nzsuti-kzkr drtwrnge le.

<sup>18</sup> Atwzlr-ngrbzk r Taetus x kzdq mzlegu kx nzamatq lr makxtr amrlx mz nzyapwxtipx-krde Nrpakxmrz.

<sup>19</sup> X nzmcpxl r nide murde navznekr badr mzli kc natwz-ngrbzk r trau lcng mz lr Jerusalem. Alekr nzwzng r lc mz nzamatq-krgr Kxetu rgu x mz nzaelwapx-krbzkr mz lr Jerusalem kx suti drtwrgu nzokatr-krgr nidr.

<sup>20</sup> Alekr da amrlx mz nzatakqtingr lc, murde leplz ma tzpibqtilr nigr mz kxmu nzlolvz-krgr trau kxetu lc.

---

☆ **8:15** Nzrlaszng r 16:18

<sup>21</sup> Murde suti drtwrgr nzale-krgr da kxtubq mz nzobqkr Gct x mz nzobqkr leplz.

<sup>22</sup> X atwzlrmi-ngrbzk ncblo lcng nzling kzdq kz mzlegu. Murde krlzkr kx nide ncblo kx brti drtwr nzwztr-angidr-krbzle mz Gct. X drtqde vq zlwz nzokatr-krde nimu mz nzatakqtingr lc, murde Taetus pibzle bade nzmrlzkr nqm q krmu.

<sup>23</sup> Ncblo lcng brti drtwr mz nzlolvz-krdr trau scmu. Murde Taetus nide kztenge kx wz-lxblrkr ncdr mz nzokatr-krgr nimu. X kxnzaclveng dzbe lrmakxtr nzatwzlr-ngrbzlr mzlegu lcng nzling x leplz nzglqlzlr Kxnmcp x mz nzmrlzkr nqm q krdr.

<sup>24</sup> Mz nzm-krde lcde, aoduamu nidr murde dzbe lrmakxtr kcng tzatwzlr-ngrmlr nidr bamu nakrlz-angidrlr kx trpokiawxu mz nzglqpx-krnge nqm q krmu.

## 9

<sup>1-2</sup> Krlzx kx abzo mz yiz kc tqvztxpe, vqti drtqmu nzprtr-krmu mz nzatakqtingr trau lc mz nzokatrngr lr Jerusalem kxnzrlxngiting. X trpengr nzpi-krbo bamu kx da lc ngi da kx myapxbz. A' nakrlzamu kx glqpx-zlwzbo nimu mz lr Masedonia Provins. X mz nzxl-krdr nzvqkr drtqmu mz nzatakqtingr trau lc, batrpzle badr nzvq-kzkr drtqdr nzprtr-kz-krdr elr.

<sup>3-5</sup> Mz nzm-krde lcde, na-atwzlr-ngrbo mzlegu lcng tq bamu, mz nzatakqti-krbzlr bamu trau kc tqpiamu kx nakapxamu. Murde suti drtwrnge kx trau lcng nayc pnz kai mzli kc nakaputr-ngrbo bamu. Mrlz nzoliqti-angidr-krmule, murde ma tqmyangr drtqmu x drtqnge kz mz

nzglqpx-krnge nimu, nzmu kzdung lr Masedonia navzbzkr badr. A' mrlz nzoliqti-kai-krmule, murde ma tizrpi drtwrdr kx rtulrtr-ngrbo bamu nzkapx-krmule.

<sup>6</sup> Murde nzrka-ngrbz da mz kx trpnzngr scdr da apule nzpengr da mz nrlanc nyz Gct. X esalz-ngrmle bagu kx sa na-amrlzle doa kx alele da lc. X Nzryrngrkxtr alvztr-ngrde nigu kx, "Doa kx pe dakxnzng kxpipzne, sa narkqtile da kxpipzne kz. A' krkng tqpe dakxnzng kxkqlu, sa narkqti-kzle da kxkqlu." ☆

<sup>7</sup> Mz nzmu-krde lcde, doa kxesz' mz nimu, nakrka'-kai-ngrbzle mz Gct x nakapxle nike pnz drtwrde nakapxle. A' bzkq rkaxq murde mz drtwrm nzrtulrtr-ngrbz bam, murde ma tgavzbzle drtwrm. Murde Gct abrtzlvz-zlwzle doa kx rka-nrbalq da kx vzdz-angidrm mz nabzde.

<sup>8</sup> X mz nzale-krmu da lc, Gct krlz-zvzle nzrka-nrbalq-krbzle da kxkqluting bamu, mz nzvz-nqblq-krde zmrlz ngrde kxmyalz-esz'ngr. Murde sutitx drtwrde kx namnc-zpwx-zvzamu mz nzrtwz-krmu da amrlx kx takitrde nzmnc-xgle-krmuleng. X suti kz drtwrde kx nartwzamu da kx nzmyaszpxlr da lcng, murde naokatr-kzamu kx trpnzngr scdr da mz nzklukr dztumung. ☆

<sup>9</sup> Murde Nzryrngrkxtr ycmnetr-ngrde ncblo kx rka-nrbalq da mz nzrpi-krde kx, "*Tresakiu nzrka-krbzle da mz kxrsuti drtwr. Vz zvz nzayzlu-krbz Gct bade mz nqm q krde lc tqtubq.*" ☆

---

☆ **9:6** Nzyrplapxng 11:18; 19:17; Hosia 10:12; Matiu 10:42; 25:34; Luk 6:38; Galesia 6:7 ☆ **9:8** Livae 25:35; Lou Kcpwz 15:7-11; Efsz 4:28; Filipae 4:19; 1 Timoti 6:6-10 ☆ **9:9** Sam 112:9

10-11 X rpi kz Nzryrngrkxtr kx, Gct rkam “rtq da kx napeti. X rka-kzp dakxnzng kx nangq.”  
 ✧ Mz nzm-krde lcde, nzrka-krbzle bamu da x nzrkrlzng kxkqluting sa naetunepx zvz, murde nzokatr-nrbalq-krmu leplz naetunepx zvz kz. X trau kcng natwzbzkr mz lr Jerusalem, sa naba-trpzle badr nzawi-krbzlr mz Gct mz nzokatr-nrbalq-krmu nidr.

12 Delc, da lcng li nzvzpxmqng mz nzokatr-krmu leplz kcng trpnzng scdr da. Leplz lcng nzrtwzng da kx takitrde nzmnc-xgle-krdrle ng x nzawi-krbzlr mz Gct etunepx zvz.

13 X lr Jerusalem lcng, mz nzngini-krdr lr Jiu, sa naglqlzlr Gct murde nzokatr-nrbalq-krmu lc nidr, kxmule-esz' trnginipuu lr Jiu. X da lc aelwapx-zpwxzbzle badr kx lxngiti-angidramu Nrpakxmrlz x drtqmu vq mz nzvz-nqblq-krmu natq Jisz.

14 X sa nakrka'-ngrdr nimu mz nivz kxetu, murde Gct aelwapx-ngrbzle badr zmrlz ngrde kxmyalz mz nzokatr-krmu nidr.

15 X na-awi-kzpzku mz Gct mz nzka-nrbalq-krmle Mrlxde bagu, kxmule-esz' rblxm bagu nzrpi-krqu nzetukr zmrlz ngrde lc tqmyalz.

## 10

### *Pol Ayzlubzle Natq Leplz Kcng Tzpiqtir Nide*

1 Mzli ka, ninge Pol, sa na-ayzlubo natq leplz kcng tzpiqtir ninge, mz nzrpikr kzdung nimu kx trngini-angidrgeu aposol. Nzycmne-krdr kxmule lc murde pnanatix nimu mz letz scngeng,

a' vz-nrwx-ngrbo bamu mzli kc tqmnc-ngrgu badr. A' mz nzvz-nqblq-krnge Kxnmcpx, avzozlbqx x vz-nrwx-ngrbo bamu, mz nzrlxti-krbo bamu kx bzkq pibqtipeamu ninge. ✧

<sup>2</sup> Mzli kc navz-ngrmc bamu, trsutiu drtwrnge nzpnanati-mou-krnge nimu mz nzayrplapx-krnge nimu. A' mwx sa na-alebo da lc mz leplz kcng tzrpilr kx vz-nqblqkr drtwr leplz mz nrlc ka.

<sup>3</sup> Kxmule-esz' mnckr mz nrlc, a' trotablr-nqblqkru nqm̄q kr lr nrlc mz nzotablr-krgr badr leplz kcng tzrpwa'-ngrmlr nzwz-krgr.

<sup>4</sup> Murde zmatq ngr nzota-krgr trvzpxpuu mz natq leplz kxtrnzrlxngitiung mz nzesabrtingr leplz. A' plzpxkr natq angidr kx kam Gct bagr. X natqdeng nzrngiscng zmatq ngr nzodatingr nqm̄q nr drtwr kznikeng trngiu da angidr. Natq lcng xplr x nzkrzlzr nzbatr-krbzlr mz leplz nztekqtr-krdr nqm̄q nr drtwrdr. Murde nqm̄q nr drtwrdr lcng tzvz-rbrng nzapulr lrpalc kx xplr kx nzawxongr mz zmatq ngr Gct.

<sup>5</sup> Murde milxtxokr drtwr x nzycmnengr amrlx kcng tzrpwa'-ngrbzlr mz leplz nzkrlz-angidr-krdr Gct. X aovxiokr nqm̄q nr drtwr lcng amrlx tzvz-rbrng, murde nzaotikr drtwr leplz da navz-nqblq-txpwzle me pnz drtwr Kxnmcpx.

<sup>6</sup> X mzli kc navz-ngrmgr bamu x namc-ngrbzkr krkcng nzmnczpebzng mz Kxnmcpx, sa n-ayrplapx-atekr nimu kcng tzxpqbrlr-ngrdr nide mz nzpxtpx-krmu nzmncz-krmamu bagr.

<sup>7</sup> Leplz kcng tzpibqtilr nigr nzrpilr kx nidr leplz neng Kxnmcpx. A' nakrlz-angidramu x leplz

✧ 10:1 Sekaraea 9:9; Matiu 5:5; 11:29

lcng nakrlz-kzlr kx nigr kz leplz nedeng.

<sup>8</sup> Drtqnge trmyau mz nzglqpx-lzbq-krgr mz zmatq kc tqkaom Kxetu rgu bagr. Murde zmatq lc ngi dalr nzokatr-krgr nimu mz nztu-amqngi-krmu mz nzrlxngiti-krmu, a' trngiu dalr nzatrkatigr nimu.

<sup>9</sup> Dekc trsutiu drtwrnge nzmwxlrsti-krmu ninge mz natq kcng tqyrbo bamu mz letz scngeng.

<sup>10</sup> Krlzx kx kzdung nimu nzrpilr kx, "Nzycm-nekr Pol mz letz scdeng matq-esz'ngr. A' mzli kcng tqmnc-ngrgu badr apunede ncblo kxmane x nzymne-krde trxplru."

<sup>11</sup> A' rngidrlvz-ngrbo mz leplz lcng, kx mzli kc namnc-ngrgu badr, sa na-atutr-angidrkr natq amrlx kcng tqyrbzkr mz letz scgrng, mz nzaelwapx-krbzkz bamu kx rngiscgr zmatq.

<sup>12</sup> Trmrlzu nzrpi-krgr kx apukr leplz lcng. Murde nzrpilr kx nidr leplz kxnztubqng x nzmyapxbzng mz kzdung kz kxnzetung. A' mz nzaotikr drtwrdr nike tubq x myapxbz, nzobqtitxtrpwzlr nidr esz'-krdr. Krlc aelwapx-ngrde kx nzngqngu-angidrng.

<sup>13</sup> A' trapukru nidr. Murde glqpx-lzbqtx-ngrpwzkr zmatq kc tqkaom Gct bagr. X nimu amrlx ngrmu mnclzmamu bagr mz zmatq lc.

<sup>14</sup> Nzmu trnayapwxtipxpwzkru Nrpakxmrlz bamu, vz-rbrkr mz nzrpi-krgr kx namnclzmamu mz zmatq ngrgr. A' ryapwpx-ayrnr-ngrbzkz Nrpakxmrlz bamu. X rngiscgr zmatq ngr nzngini-krgr aposol kcng tqmnczbzmu badr. X krkcng tzvzmqng mz nibgr trnzrngiscung zmatq lc.

<sup>15</sup> Trglqpx-lzbq-ngrgu nzwzngz kx nzale kzdung kz leplz, da kc tzwailr. A' obqtipxkr



mzli kc nabrpengr nzrlxngiti-krmu, murde mzli lc nakrlzamu nzokatr-krmu nigr mz nzvzpx-krgr mrkang kqlu mz nzyapwxtipx-mou-krgr Nrpakxmrlz.

<sup>16</sup> Murde suti drtwrgr nzyapwxtipx-krbzkrlc mz leplz kcng trnzxlrcalr Nrpa lc. X dekc krlzkr nzglqpx-lzbqtx-krpwzkr nzwz-krgr esz'-krgr, a' trngiu nzwzkr kzdu-kzng leplz.

<sup>17</sup> X nzglqpx-lzbq-krgr mz nzwz-krgr lc, vz-nqblqle Nzryrngrkxtr kx rpile kx, *“Trtakitrdeu doa nzglqpx-lzbq-krde mz nike alele, a' naglqpx-txpwzle Yawe mz nike alele.”* ✧

<sup>18</sup> Murde kxnzglqpx-lzbqng esz'-krdr trabrt-zlvzu Gct nidr, a' nide esz'-krde kx takitrde nzglqpx-krde leplz kcng tqabrtzlvzleng nidr.

## 11

<sup>1</sup> Mzlangeng x inwengeng, kxmule-esz' kr-lzamu kx takitrpwzle Gct nzglqpx-krde doa, a' suti drtwrnge kx narlr-ngrmamu bange nzglqpx-lzbq-krnge mz nzymne-ngqngu-krnge, da kc tqwaipeamu. Murde ncblo lcng tqabrtzlvzamu mzli ka, trnginidru aposol angidr.

<sup>2</sup> X tubq nzdobulvz-krnge nimu, mz nzapu-krbo bamu trtemu kc tqyapwxtipx-ayrnr-ngrbo Nrpakxmrlz bamu. X suti drtwrnge kx nivz lrmu natubq mz nzmrlztitx-krpwzmu Jiszs Kxnzmcpx, da kc tqwai trte olvi kx nayrlz suti drtwrde kx nqmq kr olvi lc natubq, mzli kc narlr-ngrbzle mz ncblo ngrde. Murde esalz-ngrbo mz Jiszs kx nanginimu leplz kxnztubqng. ✧

✧ **10:17** Jeremaea 9:23-24 ✧ **11:2** Matiu 22:1-2; Jon 3:29; Efiszs 5:22-32; Nzaelwapxng 19:7-8; 21:2, 9

<sup>3</sup> A' mwxlrtix kx Setzn sa na-avz-rbrbze drtwrmu x nabatrpzle bamu nzvecpx-lzbq-krmamu mz nzmrlztitx-krpwzmu Kxnzmcp, da kc tqwai pnz Setzn mz nzesabrti-krde Iv. ☆

<sup>4</sup> Murde lxngitiamu nrpa kx nzyapwxtipx ncblo lcng, kxmule-esz' blepxbz mz Nrpakxmrlz kc tqyapwxtipx-ayrnr-ngrbzk bamu. X suti drtwrmu nztwz-krmu kxmnc mzlilxl kx trngiu Mqngrkxtr.

<sup>5</sup> Kxmule-esz' ncblo lcng nzrpilr kx nidr aposol kxnzmyapxbzng, a' mz drtwrnge trnzmyaszpxlru ninge.

<sup>6</sup> X kxmule-esz' trkrlz-zpwxwxu kxmu nzy-cmnengr, da kc tzwailr, a' krlzx nzalvztrngr angidrng. X aelwapx-ngrbzk bamu zmatq ngr nzkrlzng lc mz da kx pibzkrng bamu x aletikrng mz mzlirmu.

<sup>7</sup> ?Nike tqrpiamu mz drtwrmu kx trmrlzu trnzrtwz-krngeu dztumung mz nzyapwxtipx-krbo bamu Nrpakxmrlz? Murde apux Kraes mz nzavzo-lzbq-krnge murde naokatr, nimu, a' rpiamu kx trtakitrdeu ninge. A' tratrkatwixu nimu mz da lcng. ☆

<sup>8</sup> Murde mzli kc tqryapwpx-ngrbo bamu, rlr-ngrbo mz kzdung kz dzbe lrmakxtr nzokatr-krdr ninge mz trau. Murde nzkrlzlr kx ninge trtedr mz Kxnzmcp. ?Myx kxmule, ncblo lcng tzpibqtilr ninge narpi-kzlr kx pnatibo dztu dzbe lrmakxtr lcng?

<sup>9</sup> Kxmule-esz' kzdung mzli trpnzng nange dakxnzng, a' tr-rlxpou da bamu. Murde mzli

---

☆ 11:3 Nou 3:1-6, 13 ☆ 11:7 1 Korint 4:12; 9:3, 12, 15-19

lcde, kzdung mzlegung kcng Masedonia Provins  
nrvzmqng x nvrkamqng bange trau kx namnc-  
xglex. X trpnzngr nztekqtr-krnge nqm q krnge lc.  
\*

<sup>10</sup> X pi-zvzbo da angidr bamu, da kc tqwai  
Kxnmcpv. Murde tr-rlxpou da bamu, nimu  
lr Akaiia Provins, murde ma tzrpi leplz kx  
pokia-ngrne nzglqpx-lzbq-krnge nzwztr-nrbalq-  
krbo bamu.

<sup>11</sup> Kzdung leplz nvrpibzlr bamu kx trnzrtwz-  
krngeu dztumung drtwr ngrde kx trmrlztiwxu  
nimu. A' nvpokiang, murde krlz Gct kx mrlzti-  
zlvwx nimu.

<sup>12</sup> Ncblo lcng tzpibqtilr ninge nvrpilir kx rsakrlrkr  
badr mz nvrprtr-krdr mz nzwzngr kcpwz tqalekr.  
A' sa na-ale-zvzx nqm q krnge mz nzwztr-nrbalq-  
krbo mz leplz, murde na-awx-nabux nzglqpx-  
lzbq-krdr lc.

<sup>13</sup> Murde ncblo kxdrka'ngr lcng tzesabrtilr nimu  
mz nvrpi-krdr kx nidr aposol neng Kraes, a'  
trnznginidru aposol angidr.

<sup>14-15</sup> Bzkq kctipxamu nidr. Murde kxmule-esz'  
ncblo lcng tzapusr-lzbq-ngrdr kxnzawzng ne Gct,  
a' nvz-nqblqlr nqm q kr kxetu rdr Setzn, kc  
tqapusr-lzbq-kai-ngrde enjrl kxluli ne Gct. A'  
mzli kc nayzlu-ngrm Jiszs, sa na-ayzlvbz Gct badr  
nikeng nzalelr mz nrlc ka.

<sup>16</sup> Nzmu narpiamu kx ngqngux, mrlz

---

\* **11:9** 11:6 Mwx Pol ycmnetr-ngrde nzamrlz-krde nrkrdrdq leplz  
x nzale-krde da kxnzktipxng mz zmatq ngr Mqngrkxtr. 11:9  
Nqm q kr Pol bletipxbz mz nqm q kr aposol kxnvpokiang. Murde  
nzrlx-zvzbzng trau kxkqlu mz lr Korint mz nzaetunepx-krdr trau  
sodr x zmatq ngrdr.

nzlalztq-krmamu bange nzglqpx-lzbq-krnge mz nzymne-ngqngu-krnge, da kc tqwaipeamu mz nzlalztq-krbzmu mz ncblo lcnq tzglqpx-lzbqng.

<sup>17</sup> A' nzymne-krnge trapuleu nzymne-nqblq-krnge Kxnmcp. A' nzglqpx-lzbq-krnge apule kxnzngqngung kcng tzbtri drtwrdr nzglqpx-lzbq-krdr.

<sup>18</sup> A' mz nzlalztq-krbzmu mz nzglqpx-lzbq-krdr, nalalztq-kzpa'mu mz nzglqpx-lzbq-krnge.

<sup>19</sup> Mz drtwrmu yrplapx-zlwzamu. ?A' myx kxmule tqabrtzlvz-ngrnamu ncblo kxnzngqngu lcnq?

<sup>20</sup> Murde abrtzlvzamu nidr, kxmule-esz' nzapusr-ngrdr nimu kxnzawz nedrng, x nzrlx-zvzbzng bamu trau kxkqlu, x nzesabrtilr nimu, x nzobqszolr nimu, x nzamyatibzlr drtqmu mz nzviplatr-krbzlr blzmr naomu.

<sup>21</sup> Drtwrnge vztz zlvz murde nigr ncblo kxnz-maneng x rblx nzvz-nqblq-krgr nqm q krdr.

A' abrtzlvz-kzamu nzlalztq-krbzmu mz ncblo lcnq nelzdr tqbr mz nzglqpx-lzbq-krdr. X mzli ka nalalztq-kzpa'mu mz nzymne-ngqngu-krnge, murde nelzng br kx sa namyaszpx nidr mz nzglqpx-lzbq-krngeng.

<sup>22</sup> Nzglqpx-lzbqng mz nzngini-krdr lr Hibru, a' ninge kz. Nzrpilr kx nidr leplz neng Gct mz nzngini-krdr lr Israel, a' ninge kz. Nzrpilr kx nzvzpxmqng mz nqvi lr melrmqgr Ebraam, a' ninge kz.

<sup>23</sup> Nzrpilr kx nzwztrpzng mz Kxnmcp. X kxmule-esz' lukurnr-ngrne mz nzpi-krngele, a' nzwztr-krbo bade myaszpx-zlwzle nidr, mz da lcde seleng. Vz zvz nzyapwxtipx-krnge Nr-

pakxmrlz. Nzadwatrngr ninge mz presin nzwrde kqlu. Nztabwxti-krdr ninge nzwrde kqlu kx ycpwz pipz nzbz-krnge.

<sup>24</sup> Nzwrde nzlvqn kxnzetu r lr Jiu nzikla-krdr ninge. X mz nzwrde lcng nzlvqn, nzwrbz nzpnu-tq-nrade-rpwxmz (39) lxblr. †

<sup>25</sup> Nzwrde tq nztzng lr Rom ninge mz dapunc. Nzwrde esz' nzvaebrtingr ninge mz rplz. Nzwrde tq mnco-ngrmc mz lcsu kx nzwxlzng. X mz kzdq mzli lcdeng, lvabetilzx mz dapunc prla z bq kx yc atwrnrngr esz'.

<sup>26</sup> Nzwrde kqlu kx vzpx-ngrne mz nzwztr-krbo mz Kxetu. X mz nzvzpx-krngeng amrlx prtilzle ninge da kxtrka kxkqlu. Murde rmctix ncblo kxayo, x lr Jiu x kxtrngiulrJiu kcng tzaetqbzlr drtqng. X leplz kcng tzpokiang mz nzrpi-krdr kx nidr leplz neng Jiszs, nzatrkatikzlr ninge. X rmcti-kzx nubla ngr lue x trlipu kxetu prla. Kxmule-esz' mncx mz mztea o peto, a' da kxtrka nzprtilz-zvzlr ninge.

<sup>27</sup> Yctxbz nzwz-kato-krnge x kzdung mzli trmwipnzwxu. X mzli kqlu kx trpnzng nange da x mqnge lue, x mzli kqlu kz kx trmu-ngrneu. X mzli kqlu kx baongr drtqng murde trpnzng me namnc-ngrne x trpnzng scnge lrpz.

<sup>28</sup> X mou, mz z bq kang kqlu yc txpwz mz drtwrnge lrmakxtr amrlx kcng tzmncclzmng

---

† **11:24** Lou sc Mosis rlr-ngrbzle mz lr Jiu nzikla-krdr ncblo nzwrbz nakrlz-tpwzle nzpnu-kxpwz (40), murde ma tzabzlr nide. A' lr Jiu pnzpe drtwrdr kx nakrlz-tpwzle nzwrbz nzpnu-tq-nrade-rpwxmz (39), murde ma tzxpqbrlr-ngrdr lou lc mz nzrlwx-rbr-krdrle, x sc tzkrlzpebzlr nzwrde kx nzpnu-pwx-nrade-esz' (41). [Lou Kcpwz 25:1-3]

bange.

<sup>29</sup> Murde nabznge talvzo zvz mz nzxlr-krnge kx nabzdr ngrgo. X ngyatx-zlwzngr drtwrnge leplz kcng tzataolr nidr mz alwx.

<sup>30</sup> A' mz nzglqpx-lzbq-krnge mzli ka, naglqpx-lzbq-ngrpwo mz da kx aelwapx-ngrde kx ninge ncblo kxmane.

<sup>31-33</sup> Murde kzdq mzli kx mnc-ngrne mz taon kxetu Damaskzs, gavzna kc tqmnclybz mz King Aretas, suti drtwrde nzlolvz-krde ninge. Zbz sc tqpipebzle mz ncblo ngr vea nedeng, nzaclve-krdr naobz amrlx ngr taon lc. A' kzdung lrmakxtr nzokatrlr ninge. X nzadwaolr ninge mz topla kxetu mz nzapu-krnge dakxznng. X nzpetrpzlr nqvi elr, x sc tzavzopelr ninge nrlarde kx yz ngr bz ngr Damaskzs, murde nayrbqpxx, mz nzapu-krnge ncblo kc trpnzngr scde zmatq. X Gct krlzle kx trpokiawxu. Nide kc tqngi Trte Kxetu rgu Jiszs, x nzrglqlz-zvzngr nide tqyc tqyc. Eu. ☆

## 12

<sup>1</sup> Kxmule-esz' trbatrpwzleu bamu nzrpi-krmu kx ninge aposol ngrmu, a' naglqpx-lzbq-mopwo. Murde mzli ka naycmnetrpex mz nzobq-rmwiblengr x da kx yc-kapq-pnzng kx aelwa-ngrm Kxetu bange.

<sup>2-4</sup> Yiz nzpnu-esz'-nrade-pwx (14) kx vztuxe, avzdz Gct ninge Heven kc tqmyalz-esz'ngr. Trkr-lzwxu kx vzdzx mz nrkrdrdqng kz o mz mqn-grnge txpwz mz nzobq-rmwiblengr lc, a' Gct kx rkrlz. A' krlz-angidrx kx mncx Me Mncngr Gct.

---

☆ **11:31-33** Aposol 9:23-25

X mz nzmnc-krnge elr, xlrx da kx rblxm bange nzyapwxtrngr mz natq ncblo, x nzrpwa'-kz-ngrm bange nzyapwxtipx-krngeleng. \*

<sup>5</sup> Glqpx-lzbq-ngrne nzobq-rmwiblengr lc, a' Gct kx aelwapx-ngrm bange. Mz nzmu-krde lcde, glqpx-lzbq-ngrne da kx aelwapx-ngrde kx ninge ncblo kxmane.

<sup>6</sup> Kxmule-esz' glqpx-lzbq-ngrne da kx obq-rmwiblex, a' trycmne-ngqnguwxu. Murde napitxpwo da kx ngi da angidr. A' trnaycmnetr-pewxu mz da lc, murde ma tqamatq-zlwzamu ninge mz nzobq-rmwible-krngeng. Murde suti txpwz drtwrnge kx leplz naglqpxlr ninge mz nike nzmclr alex, x nzxlrlr pix.

<sup>7</sup> X ninge kz, trmrlzu nzglqpx-lzbq-krnge mz nzobq-rmwible-krngeng. Mz nzmu-krde lcde, rlr-ngrm Gct nzprtr-zvz-krnge mz kzdq nzkx-pungr. Murde nakrlz-angidrx kx trpnznggr scnge zmatq, a' namnc-xglex nide. Nzkxpungr lc ngi menrpa kc tqatwzlr-ngrm Setzn mz nzapu-krde dxpa' kx luplxti-zvzle nrkrdrdqng.

<sup>8</sup> Nzwrde tq kx rlxti-ngrbo mz Kxetu nzkatxpx-krbzle nzkxpungr lc bange.

<sup>9</sup> A' rpimle kx, "Zmrlz rnge kxmyalz takitr-zvzde nzokatr-krde nim, kxmule-esz' da kx nzprtzng. Murde zmatq rnge wz angidr mz nzmnc-xgle-krm ninge mz mzlr nzkxpu-krmqng." X mz nzlxngiti-krnge da lc, abrtzlvzx

---

\* **12:2-4** Mz drtwr lr Jiu, Heven kc tqmyalz-esz'ngr nide 'Me Mncngr Gct.' Nzrpi-kzpz 'Paradaes' mz natq lr Inglis. Krlc me navzki leplz kxnzrlxngiting mz nibr nzbz-krdr. Mc kz Luk 23:43 x Nzaelwapxnggr 2:7, x natq lc mrkc Nzalvztr-ngrng Kxmyapxbz.

nzngini-krnge ncblo kxmane. Delc tqgqlpx-lzbq-  
ngrne mz da lc, murde zmatq ngr Kxnmcpix na-  
aelwapx-ngrne mz nzlu-krnge.

<sup>10</sup> Mz nzmukrde lcde, kxmule-esz' ninge ncblo  
kxmane, x leplz nzpibqtilr ninge, x da kxtrka  
nzprtilzlr ninge, x leplz nzaetqbzlr drtqngc, x  
prtrix mz nzxpungc, a' abrtzlvzx da lcng mz  
nzvz-nqblq-krnge Kxnmncpx. Murde zmatq  
ngrde wz-angidrm bange mzli kc tqmnc-xgle-  
ngrne nide.

<sup>11</sup> Nimu kx rbatrp bange nzycmne-ngqngungc  
mz nzglqpx-lzbq-krnge lcng. Murde nimu kx  
takitrde nzglqpx-krmu ninge mz nzmrlzkr nqm  
krnge. Murde kxmule-esz' ninge ncblo kxmane,  
a' krlzamu kx myaszpxx ncblo lcng tzrpilr kx  
nidr aposol kxnmzalng.

<sup>12</sup> Murde mzli kc tqmnc-ngrgu, aelwapx-ngrbo  
bamu kx ninge angidr aposol, mz nzale-zvz-  
krnge rix, x da kxnmkctipxng, x da kxmatq  
kxkqlu mz zmatq ngr Gct.

<sup>13</sup> Apusr-ngrne nimu da kc tqwaisr-ngrne lr-  
makxtr kc-kzng tzmnczmng bange. A' da  
esz'txu kx tr-rlr-ngrpou bamu, nzokatr-krmu  
ninge mz trau. Nzmu kx tqatrkatic nimu mz  
da lc, rlxiti-zlwzbo bamu kx mwix elx naipqamu  
ninge mz nabzmu.

<sup>14</sup> Mzli ka ycpe pipz nzvzkr-mopwo bamu mz  
nzwrde kratq. X sa navz zvz trnzrlr-krpou  
bamu nzokatr-krmu ninge mz trau. Trsutiu  
drtwrncg nzka-krmamu dztumung bange, a'  
suti drtwrncg nzka-krmamu bange nabzmu, mz  
nzamatq-krmu ninge. Murde nimu doa nengeng  
mz Kxnmcpix. X trtakitrdeu doa nzaclve-krdr



trtedr. A' takitrde trtedr ncdr lxedr nzaclve-krdr doa nedrng, da kc tqwaix mz nzaclve-krnge nimu.

<sup>15</sup> Delc abrtz-zlwz-ngrne kx trpnzngr da kx lolvz-moux mz nzokatr-krnge nimu, murde mrlztix nimu mz nabznge atwrnrngr. X mrlz kz nzmrlzti-krmu ninge kxpipz.

<sup>16</sup> Mz trnzrka-krpwa'muu lc bange trau, kz-dung leplz nzrpilr kx esabrtix nimu x sa napnatix trau keng tqatakqtiamu mz nzokatr-krmu kx trpnzngr scdr da.

<sup>17</sup> A' nzpokiang, murde ncblo keng tqatwzlr-ngrbo bamu trnzatrkatilru nimu x trnzpnatipw-zlru dztumung.

<sup>18</sup> Murde mz nzatwzlr-krbo Taetus, atwzlr-kz-ngrbo kzdq mzlegu badr. X krlz-angidramu kx Taetus tresabrtileu nimu mz nztwz-krde trau scmung. X nqm̄q krgr esz' mz nzm̄nclz-krbzkr mz Mq̄ngrkxtr. †

<sup>19</sup> Mwx mz drtwrmu rpianu kx yro-ngrgr da lcng mz letz lc mz nzaelwapx-krgr nztubq-krgr. A' trtingr! Murde yr̄txopwzkr da kx suti drtwr Kx̄nzm̄cp̄x n̄zpip̄x-krbzkrle bamu. X mz nzkrlz-krgr kx Gct obqom bagr, da amrlx keng tqalekr x tq̄pikr ngi dalr nzaxpl̄r-krbzkr nzrl̄xngiti-krmu, murde mrlzti-zlwzkr nimu.

<sup>20</sup> Mwxl̄rtix kx mzli kc nakrlz-ngrbo nimu, trna-abrtzlvzwxu nimu keng tzp̄txp̄x-ngrdr da keng tq̄pibo bamu mz letz kc pnz. Murde vz-rbrbeamu mz nzotabl̄r-lzbq-krmu, nzdobu-krmu, nzngyacr drtwrmu, nzota-krmu,

---

† 12:18 Lr Korint n̄zaml̄ue-zlwzlr Taetus.

nzrpibqti-krmu, nzpokia-krmu, nzglqpx-lzbq-krmu x nzayctx-krbzmu nzwzkr leplz. Nzmu kx tqmule lcde, sa trna-abrtzlvz-kzwamuu ninge mz nzayrlplapx-krnge nimu.

<sup>21</sup> X mwxlrti-kzx kx Gct sa na-amyati-mople drtqnge, murde glqpx-lzbq-ngrne nimu mz nznngini-krnge trtemu mz Kxnzmcpx. Trmr-lzu nzayrni-krmu ninge, murde kzdung nimu nzpxtpx-ngrdr nztekqtr-krdr nqm̄q nr drtwrdr mz alwx ngrdrng. A' vz zvz nzamyati-krdr drtqdr, nzmwimi-krdr leplz kx trngiu krnalzdr, x nzamqmiti-rbr-krdr mz nrkrdrdqdr. ☆

## 13

*Nzlc-apqzbkr Pol Kxrmnr-ngrbz Mz Krkcng Tzrpwa'-ngrbzlr Nzwz-krde*

<sup>1</sup> Mzli ka nzwvrde kratq deka naoklati-ngrbo nimu. X mzli lcde, sa na-ayrplapxx leplz kcng tzrpilr na-atrkatilr nzwz-krnge. Murde sa navz-nq̄blq̄x Nzryrngkxtr mz nzrpi-krde kx, “Bzkq rpiq kx doa vz-rbrpe, a' mz nzymne-krbzme natubz du mz nibrm leplz naesz' o nali kx nzmckzlr nzvz-rbr-krde.” ☆

<sup>2</sup> Mzli kc mz nzwvrde krali mz nzoklati-krbo nimu, rngidrlvz-ngrbo mz leplz kcng tzmncng mz alwx kx natekqtrlr nqm̄q nr drtwrdr. X mzli ka mz nzmnc-krbo lc rlr̄u, narngidrlvz-kz-ngrpo mz leplz lcng badr leplz kc-kzng tzmncng mz alwx mzli ka. Murde mzli kc navz-ngr-mopwo, trpengr doa kx nayc mz drtwrnge nide, a' sa na-ayrplapxx leplz amrlx kcng tzvz-rbrng.

☆ **12:21** 2 Korint 2:1-4 ☆ **13:1** Lou Kcpwz 17:6; 19:15; Matiu 18:16; 1 Timoti 5:19

<sup>3</sup> Sa na-alex da lc murde kzdung nimu leplz nzrpilr kx nzmu na-aelwapx-ngrbo nzrngisc-krnge zmatq mz nznngini-krnge aposol ne Kxnm-cpx. X sa namclr zmatq lc mz nzayrplapx-zlwz-krnge nidr. Murde trnavz-nrwx-ngrpou badr.

<sup>4</sup> Mzli kc tztqlvztrngr Kxnmcpm mz kros, opxm kx trpnzngr scde zmatq. A' mzli ka lupe mz zmatq ngr Gct. Mz nqmqlcpwz, mz nzaxvctr-krbzkr bade, rpiamu kx trpnzngr scgr zmatq mzli kc tqmnc-ngrgu. A' sa namcamu kx prtr-kzpzkr mz zmatq kc tqatulzmlc nide mz nzbzngr, mzli lc na-ayrplapxngr nimu.

<sup>5-6</sup> Naobqtitramu nabzmu. Doa kx esz' mz nimu, nakrlzle kx Jiszs mncpxm mz nabzm o trtingr. Murde nzmu kx tqlxngiti-angidrpeq Jiszs Kxnmcpm kc tqbz-ngrde nim, nakrlz-kzq kx abtrpzme drtwrm bade mz nzyapwxtipx-krbzkr nide bam. A' doa kx Jiszs trmncpxpuu mz nabzde, trnginideu kxrlxngiti angidr.

<sup>7</sup> X krka'bzkr mz Gct kx trpnzngr nimu kx navz-rbr mzli kc nakrlz-ngrbzkr nimu. Nzkrka'-krgr lc trvzpxpuu mz nzsutikr drtwrgr leplz nzkriz-krdr zmatq ngrgr mz nzayrplapx-krgr nimu. A' nzkrka'ngr lc vzpxm mz nzsutikr drtwrgr nzale-krmu da kxtubq, kxmule-esz' leplz trnzmlru zmatq ngrgr. X mz drtwrgr, trngiu da kx myapxbz nzaelwapx-krgr zmatq ngrgr.

<sup>8</sup> Murde zmatq lc trngiu dalr nzayrplapx-krgr leplz kcng tzvz-nqblqpelr Nrpa Angidr. A' zmatq lc ngi dalr nzvectr-krmgr leplz mz nzlxngiti-krdrle.

<sup>9</sup> X mzli kc tqlolvz-amqngi-ngrnamu nzrlxngit-ingr angidr, abrtzkr kxmule-esz' zmatq ngrgr yc-

kapq. Murde krka'-zvz-ngrgr kx nzrlxngiti-krmu nabr.

<sup>10</sup> Dekc tqyr-ngrbo letz lc bamu mz natq kx xplr mz nzmnc-rlru-krbo bamu. Murde mzli kc nakrlz-ngrbo nimu, trsuti drtwrge nzayrplapx-zlwz-krnge nimu mz zmatq kc tqkam Kxetu bange. Murde zmatq lc ngi dalr nzokatr-krnge nimu mz nztu-amqngi-krmu mz nzrlxngiti-krmu, a' trngiu dalr nzamyati-krbo drtqmu o nzatrhati-krnge nimu.

*Natq Ngr Nzarlz-lzbqngr*

<sup>11</sup> Mzli ka, kx mzlengeng x inwengeng, naelalz-ngrm drtwrmu Kxetu. X nzrlxngiti-krmu nabr mz nzvz-nqblq-krmu natqngeng, mz nzesz'tikr drtwrmu, x mz nzmnc-zpwx-lxblr-krmu. Murde mz nzale-krmu da lcng, Gct kc tqrkam nivz x nzmnc-zpwxngr, sa namnc mz mzlirmu.

<sup>12</sup> Mz nzrmcti-lzbq-krmu, male-lxblramu mqmu mz nivz.

<sup>13</sup> Leplz ne Gct amrlx kcng tzmncng mrka Masedonia Provins, nzrpibzlr bamu kx, "Nimu la."

<sup>14</sup> Krka'-ngrne kx nivz lr Gct, x zmrlzkxmyalz ngr Kxetu rgu Jiszs Kxnzmcp, x nzodutr-lxblr-krmu badr Mqngrkxtr, nayc-zvzbz bamu.

Delape, Ninge *Pol*.

**Nzryrngkxtr Kc Ate Rut x Sam**  
**The New Testament plus Ruth and Psalms is the**  
**Natügu language of the Solomon Islands**  
**Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 18 Apr 2025 from source files dated 31 Aug 2023

fb2b7f06-e254-5fb7-b59d-ee21d5d7a93f